

Pol Mon Tesilonaiika Wumb Nga Endi Polpu Kindim

Pol Pipe Endi Nga Polpu Tesilonaiika Konu Kindim

¹ Sailas, Timosii, na Pol, sin wu kei pipe nga polpun kin, enim Tesilonaiika konu ele wumb Gos tilap ele molmun wumb ei, kin kindinmin. Enim Erinjpin Gos ni, Owundu Jiisas Krai kin, ouni molmun.

² Erinjpin Gos ni, Owundu Jiisas Krai enim kin noman ka ngang kin, enim noman emin peng ka mulngii.

³ Enim sin enginjpin nol piipin kin, kunum kunum Gos kin prei er ngopun molmun. Nimbi! erang enim pii gii ei dinga palim. Pe enim wumb endeim endeim ni, noman ka ngangin kin, am opu ka ba.

⁴ Sin sinim nge piipin kin, sin Gos tilang wumb molmun konu ele embe ni, tonu kindpin enmin. Erpin kin, sin wumb eipi kanpin ninmin ei, enim nge opu orung wumb ol embin tui tonu onum ei, piipin yi mi! ninmin ku. Tesilonaiika wumb ei, pii gii dinga peng molk kin, ngenj kumbii ol kis kanim kanim ni, ol embin tui tonu onum ei, dinga kindik molmun ei, piipin ninmin.

⁵ Nemin ol ei, sinim yi mi! andan topu ngonum ei, Gos eim nge kos piimba ei, kun ka mendpil molum. Ol ele nge, enim ol embin tui ei, enim kin tonu omba; ba enim dinga puk kin, Gos sinim

tep er mołum konu ełe, enim tuk puk mułngii ni pendim. Ei keimi, enim kaplı pungii. Puk kin, Gos sinim tep er mołum konu ełe, tuk puk mułngii.

⁶ Gos oł kun ka yi mił ermba. Wumb enim kin oł kis enjing wumb ei, Gos nga enim kin erpi, orung kindmba.

⁷ Kunum ei, Owundu Jiisas orung omba kunum ei, Gos eim pe enim oł embin tui palim ei, to eipi kindmba. Kindang kin, enim konu ka ełe kor mułngii ei, sinim ouni mułmun. Gos nge enjel dinga ei, ombu kin, Jiisas kin, epin konu ełe si kindik kin, mani ongii. Ok kin, konu peni ełe tor ongii kunum ei, dup owundu kin, Gos kos piimba epi ei, ouni ongii.

⁸ Kunum ełe, wumb singindmba kunum ei, wumb Gos lo ek ekii sinarik enmin wumb ei, peni ełe ongii. Jiisas Owundu eim wumb ombu topu, eim gupu ełe neng kin, poru nimba.

⁹ Wumb ei, kumep kis yi mił singii. En enim Gos kumb ełe mularik konu ełe, turii eipi molk. Molk kin, Owundu nge tilang ei kinarik kin, eim oł dinga wii ei kinarik kin, am mendpił pungii.

¹⁰ Wumb ombu nge, Jiisas omba kunum ei, am pungii. Puk kin, kunum owundu ełe, Jiisas wang kin, wumb Gos nge mułngii wumb ei, Gos embe ambıl tonu kindngii. Nga wumb Gos eim kin pii gii nik mułngii. Molk kin, sin wumb nge ek tuk enim konu ełe ninjpin; ba enim pii gii dinga ninjing.

¹¹ Sin oł ei tonu omba ni piipin kin, kunum kunum sinim Gos ei, eim enim paki tumba nipin kin, Gos kin prei er ngopun mułmun. Sin pii gii nipin kin, kongun keimi minj er poru ningii.

¹² Yi palim ei piik kin, kunum ele, sinim nge Owundu Jiisas embe enim ambil tonu kindngii. Yi erangin kin, nga eim enim embe ambil tonu kindmba ku. Nga sinim Gos kin, Jiisas Kraiis ouni nge noman emin ka ngumba. Ngang kin, enim yi mil erngii.

2

Lo Ek Pinarpi Ek To Kindilim Wu Kis Endi

¹ Enginjpini nol, akip sinim nge Owundu Jiisas Kraiis orung omba nge ek nimin enmin. Ei eim orung omba ei, sinim eim kin tep to mulmun ek dinga ei, nipin ngonmun.

² Pe wumb enim kanik kin, Owundu nge kunum owundu tonu om poru ninim ningii. Nga ek ni tor kindilimin wumb mendpil ei, wumb nilmin mil, ek ni tor kindilim kend endi opu yi nimba. Nga wu endi opu, sin enim kin pipe yi polk kindnjing nik, yi erngii ei, enim sikir noman embin to piik kin, noman eipi eipi sek enerngii mon!

³ Wu kombur ok ol ek kend tok erik kin, ningii ek ei, enim kom sek piinerngii mon! Kunum owundu Jiisas orung omba kunum ei, wii on-ermba. Kumb ok wumb pei, en enim Gos ek piinarik kin, Gos bul ngok enjing. Pe lo ek to kindpi kin, ol kis nge kanim kanim elim wu ei, opu peni ele tor omba. Wang kin, ekii se, eim dup konu kis ele poru nimba kunum ei, Owundu Jiisas orung omba ei, eim ok yi ermba.

⁴ Epi kanim kanim, wumb en enim men tok elmin epi ei, Seisen nge wu kis ei, eim epi ombu pei erpi, kis erpi kin, am epi ombu kin, opu orung

erpi, ngopu yi ermba. Epi ombu pei to mani kindpi kin, eim pupu Gos men ngii owundu ele nirik pupu moľpu kin, ek yi miľ nimba; na Gos mendpiľ moľ.

⁵ Ok na enim kin moľup kin, ek ei nge, nip enim ngunj ek ei, enim si kindnjing min, piik moľmun.

⁶ Enim piinmin; akip lo ek to kindpi elim wu ei omba; ba pe epi endi, eim andlam ele ondu ngonum ei piinmin. Kunum endi, kun simba kunum ei, lo ek to kindilim wu kis ei, tor opu, peni ele muľang kin keningii.

⁷ Enim piinmin; lo ek to kindik enmin oľ ei, pe kongun dinga palim. Pe oľ kis nge pulwu ei, koi er pepi muľang kin, pe wumb nii endi, eim andlam ele ondu ngo pendim ei, eim orung wu kis ei, ei peni ele muľmba.

⁸ Kunum ele, lo ek to kindpi elim wu ei, tor opu peni ele opu muľmba. Muľang kin, Owundu Jiisas eim gupu muľung je, pupu tang kin, lo ek to kindpi elim wu ei kuľmba. Kuľang kin, Owundu tor orung omba kunum ei, tiľang owundu ermba konu ele kun Gos nge ek to kindpi kin, lo ek to kindpi elim wu ei, eim am to kis mendpiľ ermba.

⁹ Lo ek to kindpi elim wu ei, Seisen nge dinga ele kongun elim. Pe Seisen nge dinga ele, ek kend oľ ei ni, oľ dinga wii kombur elim. Nga Seisen nge dinga ele, jep oľ kanim kanim elim ku.

¹⁰ Erpi kin, lo ek to kindpi elim wu ei, eim ek kend topu, oľ kis kanim kanim erpi kin, wumb konu kis ele, am pungii nipi ermba. Am ek kend mami topu, wumb ngopu elim. Pe wumb ei, en enim ek keimi ei piik muľangin kin, Gos wumb

ombu sipi orung tilang ermba; ba en enim ek ei noman ngunarik kin, buł ngunjung.

¹¹ Yi erangin kin, Gos eim ek kend dinga wii endi topu, wumb ei ngang kin, wu kis ei, eim nimba ek ei mił, pii gii dinga nik mułngii.

¹² Pe wumb Gos ek mendpił ei, pii gii ninerik; ba oł kis ei ermin ni, ka ka piik enmin. Wumb ei, Gos kos erpi, kumep tumba kunum ei, ngenj kumbii owundu singii palim.

Gos Enim Sip Orung Simbii Nip Pendim Palim

¹³ Ba enginjpın noł, Owundu enim noman ngopu yi erang kin, sin kunum kunum enim kin, prei er Gos ngopun mołmun. Kumb ok Gos enim sipi, orung sipi kin, orung simbii nipi pendrim, ek ei palim. Gos nge Gui Ka ei, enim Gos nge wumb mendpił nipi pendim. Enim Gos ek keimi ei, pii gii mendpił ninjing oł ei nge, Gos enim sipi orung simba.

¹⁴ Sinim nge Owundu Jiisas Kraıs tilang owundu ei, Gos enim ngumba. Sin enim Gos ek ka ni ngupun kunum ei, Gos enim wii to sirim.

¹⁵ Yi piik kin, enim sin enginjpın noł; enim dinga angk mułngii. Gos nge ek pei, enim kin nipin ngunjpın kin, nga pipe kindinmin ei, ekii sik, andik mołmun ei, piipin ninmin.

¹⁶ Jiisas Kraıs sinim nge Owundu ni, sinim Erinjpın Gos ei, eim sinim noman ngołum. Nga eim noman emin ka ei, sinim kin ngang kin, sinim kin ek ka wii endi simin ni piipin kin, kui er mołmun ei, Gos orung omba kunum ei, simin.

¹⁷ Nga Gos enim noman dinga ngang kin, eim enim paki tang kin, eim enim ol pei ka erim kin, ek ka minj nik, yi erngii!

3

Enim Gos Kin Prei Erangin Kin Sin Paki Tumba

¹ Enginjpın noł, sin enim kin ek nga kombur salim. Ei yi mił, enim Gos Owundu kin prei erangin kin, Gos sin paki tumba. Tang kin, Gos ek ka ei konu orung orung pei pang kin, ek ei embe tonu ba; ba enim konu ele yi mił noman tuk ele punum.

² Enim Gos Owundu kin prei erangin kin, wumb kis ok sin kin ol kis enjing ei, Gos kaplı paki topu kin, si kindmba ei, enim piınmin. Wumb pei, Gos kin pii gii ninenjing wumb pei mołmun.

³ Ba Gos Owundu eim ek keimi dinga mendpił nilim ol eipi yi mił ermba. Eim enim paki topu kin, enim tep dinga ermba. Yi erang kin, Seisen enim mułngii konu ele tuk onermba.

⁴ Owundu sin noman dinga ngang kin, sin enim kin ek yi mił ninmin; epi pei sin enim erei ninmin ei, enim yi elmin. Ekii se enim yi minj er mułngii.

⁵ Sin noman yi piınmin; Gos enim noman ambıl kun erang kin, enim Gos enim noman ngopu eririm ei piıngii. Nga Jiisas Kraıs eim dinga pupu kin, ngenj kumbii sirim ei, enim pii gii ninmin ku.

⁶ Enginjpın noł, sinim nge Owundu Jiisas Kraıs embe ele, sin enim kin ek dinga yi mił ninmin. Enim nge Gos kin pii gii nik enginjing endi sin ok ni ngupun ek ei, piınarpi wii mułum kin, enim wu ei omba ei, kanik kin, ok eipi puk, yi erngii.

⁷ Enim piinmin; enim sin erpin ol ei erngii. Ok sin enim kin mulpun, kunum ei, sin wii mulerpin mon.

⁸ Sin enim angil ele, kuni wii si nunerpin mon. Sin top minj erpin. Sin kongun dinga erpin ei, kongun epin, tinga pei, kongun erpin. Nimbil erang sin ol embin tui endi, enim ngenj ele, embin endi kindnerpin.

⁹ Yi mil, sin enim kin kuni ni, epi si nulamin; ba yi mil enerpin mon! Nimbil erang sin ol yi eramin kin, enim sin enmin ol ei kanik kin, ekii singii ni piipin erpin.

¹⁰ Enim piinmin, kumb ok sin enim kin mulpun kunum ei, sin enim lo ek ni ngupun. Ei yi mil, wu endi kongun enerim kin, eim kuni nunermba nilmin.

¹¹ Nimbil erang sin ek yi mil nipin? Ei yi mil, enim mulk konu tuk ele, wumb kombur wii molmun nengin piipin kin nipin. Ei kongun enarik kin, wii minj molmun nik; ba en enim, ek eipi eipi, wumb eipi epi ei, sin sinim epi nik elmin. Ba en enim epi mendpil mon.

¹² Sinim nge Owundu Jiisas nge embe ele, sin lo ek nipin kin, wu ombu nge ngupun. Sin ek yi enmin piik kin, ol yi erngii ni piipin nipin elmin. En enim mandi ele, kun ka molk kin, kongun erik kin, en enim nge kuni tonu wang kin, nungii nge nipin elmin.

¹³ Ba enginjpipin nol, enim ol ka enmin ol ei, ei kindmin ninerei mon!

¹⁴ Pe wu endi, sin pipe polpun ninmin ek ei, ekii sinerim kin, enim wu ei kin, andan to kun er ngok mulngii. Molk kin, eim omba konu ei, ek

tang ngunarik erangin kin, eim singambil erang piimba.

¹⁵ Sin kin opu orung wu nik kin, ek ngok yi enerngii mon! Enim yi piingii, sin enginpin nik, ngungii.

¹⁶ Gos Owundu eim noman emin ka nge pulwu ei, eim kunum kunum eim enim kin, epi pei enim noman emin ka ngopu kin, Owundu eim enim kin kunum kunum tep er mulmba.

¹⁷ Na Pol, na nam ek ei polup kin, enim ngond. Enim ka muleiyo! Na pipe pei nam polup kin, enim ngoł. Ek yi mił, ni polup kin, enim ngoł.

¹⁸ Sinim nge Owundu Jiisas Krais ei, eim nge noman ka ele enim kin pei mulangli!

Gos Nge Ek Ka Ei Sinim Kin Ngolum
The New Testament in the Nii Language of Papua New
Guinea

Nupela Testamen long tok ples Nii long Niugini

copyright © 1980 Wycliffe Bible Translators, Inc.

Language: Nii

Dialect: Central Wahgi

Translation by: Wycliffe Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-04-23

PDF generated using Haiola and XeLaTeX on 18 Mar 2025 from source files dated 31 Aug 2023

57529bce-9e23-5350-904d-243a1b359818